

**Sing vooraf staande:** Psalm 20:1, 2, 6 (p. 90)

- 1 O, mag die HERE u verhoor / in dag van nood en stryd!  
En mag die Naam van Jakobs God / u dek in oorlogstyd!
- 2 Mag Hy sy heil en bystand stuur / uit hoë heiligdom,  
en u uit Sion ondersteun, / van waar u hulp sal kom.
- 6 Nou weet ek dat die Here sy / gesalfde sal verhoor;  
uit heil'ge hemel antwoord Hy, / tot magsdaad aangespoor.

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die kragtige  
werking van God die Heilige Gees.

**Amen.**

Lofpsalm 84:5 (p. 425)

- 5 O God, ons skild, ons teëweer, / sien tog op u gesalfde neer,  
skenk hulp en heil aan Sions koning! / Een dag is in u huis my meer  
as duisend waar ek U ontbeer; / veel liever is ek in u woning  
'n drumpelwagter, as gewend / aan yd'le vreugde in sondaarstent.

Gebed

Psalm 2:3 (p. 6)

- 3 “Durf jy dit waag om met my krag te twis? / Sal niet'ge stof My my gesag ontwing?  
Of weerstand bied aan wie almagtig is? / Ontsien my toorn, verdwaasde sterweling!  
Vergeefs wil jul my ryksbestel weerstreef. / Ek het my Vors gesalf – wee, wie Hom hoon! –  
op Sionsberg van heiligheid omgeef, / waar Hy sal heers en ewig sit ten troon.”

Skriflesing: Johannes 1

Teks: Johannes 1:41; Kategismus Sondag 12

**Hy het eers sy eie broer Simon gekry en vir hom gesê: Ons het die Messias  
gevind – dit is, as dit vertaal word, die Christus.**

Ons het die Messias gevind! Dit is die Hebreeuse woord vir die Griekse naam *Christus*. In Afrikaans  
vertaal ons dit met: *Gesalfde*.

- Hierdie mense het geloof en soek na 'n Verlosser wat deur God gesalf is om Verlosser te wees.
- En hulle het Hom gekry. Hulle het die hele dag by Hom gebly.

Daarna gaan die mense om die Messias te verkondig aan die ander mense. Hulle moet weet dat Hy leef!

- Natánael staan eers skepties oor die saak:
  - Kan daar uit Nasaret iets goeds wees? vra hy.
  - Filippus antwoord: Kom kyk! En kyk net wie het hulle gekry!
  - Hulle het die Man gekry wat van ewigheid af deur God gesalf is om met 'n mensegestalte die uitverkorenes op die aarde te verlos.

Toe Jesus die eerste keer na Johannes die Doper toe aangeloop gekom het, het die Gees van die Here sy verstand oopgemaak, en hy het gesê:

**Dáár is die Lam van God wat die sonde van die wêreld wegneem**  
(Johannes 1:29 AFR1053)

En weer:

**Ek het Hom nie geken nie, maar Hy wat my gestuur het om met water te doop, Hy het aan my gesê: Op Wie jy die Gees sien neerdaal en op Hom bly, dit is Hy wat met die Heilige Gees doop.** (Johannes 1:33 AFR1953)

Hy praat hier van iemand wat deur God gesalf word – die Messias/Christus. God salf met die Heilige Gees. Dit is dus:

- Iemand wat deur God met mag, liefde en majesteit beklee word en dan aan ons gegee word.
- Die Messias, of Christus, deur wie ons geroep word tot bekwaamheid in die geloof.
- Hy is gestuur met 'n drievoudige amp. Hy openbaar self dat die Vader Hom gesalf het om ons **Profeet, Priester en Koning** te wees.

### **Die Profeet preek die weg.**

- Hy leer die kudde van die Here die weg van verlossing.
- Sy mond preek van die liefde en die oordeel van die Vader.
- Hy verkondig die raad van God.
- Hy preek ook dat die Here sy Gesalfde stuur om die wat aan die Here behoort uit die hand van die duiwel los te skeur.
- Ons kan luister as Hy leer, want Hy word nie onder die leuen gebore en getooi soos ons nie. Hy gaan ook sonder sonde deur die lewe. Hy is die enigste Een wat werklik aan die Vader gehoorsaam is.
- Hierdie Profeet van ons kom troos mense wat in sonde verlore is met die beloftes wat God aan hulle gemaak het. Hy preek verlossing uit ons smarte. Hy preek lewensblydskap, en dat ons in die hiernamaals in die ewige geluksaligheid sal leef. Hy preek troos vir die twyfelmoediges. Al lyk dit of ons op die aarde teen die sonde verloor, Hyself kom om die duiwel vir ons te oorwin.
- Vir die mense wat arm is, profeteer die Here blydskap, want Hy het ook gekom om almal van armoede te bevry. Hy gee aan ons die rykdom van die koninkryk van God. In hierdie lewe is dit rykdom van geloof, en in die hiernamaals oorfloed van alles. Hy is gesalf om aan ons geestelike rykdom te gee.
- Die Gesalfde van die Here het almal ook verbaas met sy kennis. Op twaalfjarige leeftyd redeneer Hy met die wyses van Jerusalem.
- Hy is die profeet met die sterkste prediking. Hy gebied 'n legioen duiwels om die besetene van Gadara te verlaat. En hulle sidder. Siekes juig na genesing. Ellendiges prys God omdat hulle sondes vergewe is. Sonder die lering van hierdie profeet van die Here is ons verlore.

### **Maar Jesus is ook Priester.**

- Die Profeet leer die weg. Die Priester maak die volk bereid en gereed om hierdie weg te bewandel.
- Jesus kom as die hoogste gesalfde Priester wat die hoogste offer van alle tye moet bring. Regdeur sy aardse lewe is Hy besig met ons verlossing voor God.
- Die Gesalfde van God is juis ook gestuur om as Priester ons met God te versoen.
  - Ons het versoening nodig, want ons is blind vir die almag van ons Skepper.
  - Ons is onkundig oor die Wese en Persoon van die Drie-enige God.
  - Ons is skuldig aan verraad teenoor Hom. Ons weier om sy bevele konsekwent te handhaaf.
  - So maak ons onself God se openlike vyand.

Soos wat die taak van die priester was, bewerk Jesus dit dat die Here ons al hierdie wandade kan vergewe.

- Hy offer 'n offer wat volmaakte versoening gee.
- Hy offer Homself.

- En terwyl Hy die vloek van gekruisig word deurgaen en gemartel word, en sy lewe aflê, kry ons vergewing van sondes.

Maar dis nie al nie. Ons Hoëpriester se werk is toe nie net op die aarde voltooi nie. Hy gaan terug hemel toe.

- Daar staan ons Hoëpriester aan die regterhand van die Vader.
- Oomblik na oomblik bid ons Priester nog al die tyd vir ons by sy Vader. Hy bid sodat die Vader aan ons die ewige lewe gee. Deur Hom verwerf ons ook die onbeperkte genade van die Vader.
- Die Hoëpriester maak ons meer as oorwinnaars oor die sonde en die kwaad. Hy sorg daarvoor dat geen dood of lewe, of engele, of owerhede of magte ons kan skei van die liefde van God nie.

### **Christus is ook die gesalfde Koning.**

Die Profeet preek die weg. Die Priester maak ons bereid om die weg te bewandel. En die Koning regeer ons so dat ons op hierdie pad loop.

Elke gelowige en elke gemeente gaan deur stryd. Soms baie fel stryd.

- Die duiwel gryp elke mag en elke geleentheid aan om die gelowiges te beveg, maar ook om hulle te gebruik om onmin en verwoesting te saai.
- Die haat van die hel is werklik oor die kerk.

Ons ervaar dit ook in ons lewe:

- Versoeking en oortreding is male sonder tal voor elkeen van ons – die een aanlokliker as die ander een.
- Die een met soveel belofte as die ander. Dikwels ervaar ons dat die eerlikheid van die gelowige vir hom 'n struikelblok word.

Ongelowiges maak ons geloof af as die absurdste ding wat daar is.

- Die eer van God word in ons hele wêreld misken.
- Geloof en aanbidding is vir sommige mense iets lastigs.
- Vir ander is dit weer bloot 'n emosionele beleving.
- Al die beloftes van Jesus Christus word as 'n ydele versinsel voorgestel.

*Maar juis daarom het ons hierdie gesalfde Koning so nodig. Ek en jy sal nie hierdie pad kan aanhou loop as iemand met baie groot Geestesmag ons nie daarop hou nie. Ons sal ingee.*

**Ons Koning Jesus Christus** dra ons deur die versoeking.

- Hy gee volheid aan alles wat vir ons deur die wêreld as klein en leeg voorgehou word.
- Hy leer ons dat die duiwel sy voortbestaan ook net aan die lankmoedigheid van God te danke het, en dat God se lankmoedigheid eendag gaan gedaan raak, en daarmee saam ook die voortbestaan van die Satan.

Ons Koning moes 'n geweldige pad loop voordat Hy sy koninkryk uit die hand van sy Vader ontvang het.

- 'n Krip was die wiegie wat aan sy geboorte die eer gegee het.
- 'n Kruishout het Hom in sy doodstryd regop gehou en ondersteun.
- 'n Leë klipgraf het aanskou hoe Hy uit die dood wakker geword het, en hoe die engel van God die steen voor die opening verwyder het.

Maar, die engele het gejuig toe Hy opstaan, en ook toe Hy hemel toe opgevaar het.

- Nou maak Hy by sy Vader alles gereed vir ons aankoms in sy koninkryk.

- Daar is sy regering so standvastig dat niks en geen mag ons ooit uit sy hand kan ruk nie.

Maar Hy preek ook aan ons dat Hy mense skei.

- Die verdienste van die Gesalfde van God was vir die wat die Vader Hom gegee het.
- Sy dood was nie net om aan ons wat uitverkorenes is sondeloosheid te verseker nie.
  - Sy dood was ook 'n bevestiging van sy mag om die duiwel te vernietig.
  - Sy haters gaan met sy toorn getref word.

Geliefdes, Filippus en Natánael het hierdie Gesalfde gevind. U moet Hom ook vandag hoor preek in die Gees, terwyl Hy u siel versterk. Hy bevestig al sy beloftes aan u. Sy Gees profeteer in u binneste dat u deel is van die koninkryk van God, en dat u ook moet sorg dat dit kom.

Kom ons lees Kategismus Sondag 12 saam:

**Vraag 31: Waarom word Hy Christus, wat Gesalfde beteken, genoem?**

*Antwoord: Omdat Hy deur God die Vader bestem en aangestel en met die Heilige Gees gesalf is (a) tot ons hoogste Profeet en Leraar (b), wat aan ons die verborge raad en wil van God aangaande ons verlossing ten volle bekend gemaak het (c); tot ons enigste Hoëpriester (d), wat ons met die enige offer van sy liggaam verlos het (e) en met sy voorbidding gedurig deur by die Vader vir ons intree (f); tot ons ewige Koning, wat ons met sy Woord en Gees regeer en ons by die verlossing wat verwerf is, beskerm en bewaar (g).*

*(a) Ps 45:8; Heb 1:9; Jes 61:1; Luk 4:18. (b) Deut 18:15; Hand 3:22; 7:37; Jes 55:4. (c) Joh 1:18; 15:15. (d) Ps 110:4. (e) Heb 10:12, 14; 9:12, 14, 28. (f) Rom 8:34; Heb 9:24; 1 Joh 2:1; Rom 5:9, 10. (g) Ps 2:6; Sag 9:9; Matt 1:5; Luk 1:33; Matt 28:18; Joh 10:28 Op 12:10, 11.*

**Vraag 32: Waarom word jy 'n Christen genoem (a)?**

*Antwoord: Omdat ek deur die geloof 'n lid van Christus is (b) en daardeur deel aan sy salwing het (c) sodat ek sy Naam kan bely (d), myself as 'n lewende dankoffer aan Hom kan toewy (e) en in hierdie lewe met 'n vrye gewete teen die sonde en die duiwel kan stry (f) en hierna met Christus in ewigheid oor alle skepsels kan regeer (g).*

*(a) Hand 11:26. (b) 1 Kor 6:15. (c) 1 Joh 2:27; Hand 2:17. (d) Matt 10:32; Rom 10:10. (e) Rom 12:1; 1 Pet 2:5, 9; Op 1:6; 5:8, 10. (f) 1 Pet 2:11; Rom 6:12, 13; Gal 5:16, 17; Ef 6:11; 1 Tim 1:18, 19. (g) 2 Tim 2:12; Matt 25:34.*

**Amen**

Slotgebed

Slotpsalm Skrifberyming 2-3:1 (32:1)

- 1 Toe het die hoë lug gebeef / en eng'lestem het neergesweef:  
 Nou is die koninkryke weer / die eiendom van onse Heer  
 en van sy Ryksgesalfde wat / die wêreld in sy vuus omvat.  
 Hy sal – beslis is nou die stryd – / as Koning heers in ewigheid."

Die genade van die Here Jesus Christus en die liefde van God en die gemeenskap van die Heilige Gees bly by u almal.

**Amen**

Dr MJ du Plessis  
 Gereformeerde Kerk Bellville  
 Datum: 7 September 2003; 9 Mei 2010